

四庫全書

集部

欽定四庫全書

集部
勉齋集卷六
八

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官中書臣王家寶

謄錄監生臣陳炳

謄錄監生臣陸肇脩

欽定四庫全書

勉齋集卷六

宋 黃榦 撰

書

復楊知縣通老

揖

幹朶朶如昨無足道者課入粗辦免追逮之擾皆庇之
及鄰庫無職亦以俸入之薄藉以相助又適正官物故
新官未行擾擾特甚然亦幸可支吾來諭所謂盡心者
誠當居之無倦行之以忠夫子以是為為政之法思之

誠有味也陳膚仲尚留婺女云春間方歸彼亦幸而外除耳若果留中今亦不免矣時論變遷吾人只當靜以處之改節者固不足道不改節者亦以躁得罪皆非所宜也楊志仁同令姪在彼可以相伴頃聞其歸興甚濃不若且留之為佳吾人仕宦只得了公事私家瑣細不可無朋友相貼也

翰汨沒如昨無足道者庫中夏月絕無事乃以鄰庫不容辭雖已有正官年少不更事頗費料理所幸人情無

他可以相處但所惜者如此日力顧用之於猥瑣為可恨耳政成事簡百里蒙惠亦非小事均氣同體在天地間不忍之心人所共有得以行吾志豈不樂哉志仁能留彼相處尤非易得若其決去則實未有人可相從也先師日遠大義日微每竊嘆悼朋友過此者多往往不能久留相與痛相規切為之奈何

榦去冬已一考度滿罷之日契丈尚未美辭當決意求為旬月之款近謙之亦來此尚往來都下渠亦甚有走

求見之意得永嘉徐居父書亦欲此來即往拜見亦未知果何如也今兄因書煩致意敬義記當述師說以答尊命此便甚亟不能敬承也

榦行李以午後次郡城首謁江戶相約來早見太守又須逗留一日而後可離也深念聚合之難終日作惡稍自遣者以契丈得志仁兄朝夕相聚又今孫頗謹厚警敏入邑事井井有條人被實惠上下相孚無他掣肘足以慰朋友遠別之情耳榦僕僕遠役甚非得已今日之

事肉食者不以為憂而吾輩乃為之戚戚亦足見其跡也

榦猥賤苟遣無足道者雜居庸保以販鬻為業責任甚輕真為貧所宜處歲且小稔米價甚平俸入雖薄可以無飢如是足矣但無朋友之益無講習之功良以為懼旬日間忽天台永嘉一二友人求訪且志仁景孫繼至因得紬繹舊聞茅塞旋除然亦可暫而已竊聞德政所加人吏相孚財賦既可辦則撫字乃優為者學道愛人

之效豈真所謂偽也哉志仁立志堅苦窮理不苟友朋中所難得景孫篤實可與共學但恨不能久留亦恐契大望其歸不敢久留之也膚仲此來志氣甚鈍初勉其注一小近倅或再注榦官不以為然今遠次豈易待耶舜和遂為古人極可傷念少壯者不可保如此益使人凜然恐無復有卒業之日矣近事想聞之又似一變吾人但當堅守此志死生無二命義可畏甚於鼎鑊不可回互反為異已者所笑也如何

復江西漕楊通老

捐

榦連日獲侍教誨益見都運國博德盛仁熟無非切實
之論經歷州縣採之輿論皆以為凡所施行最為得體
謙抑下問且俾述愚見以備參考辱愛予之厚不敢自
默竊以為都運國博今日為監司與前日為州縣不同
今日之精力亦與向日不同頃嘗見相識云雷聲發杳
冥之中如嬰兒然及其擊搏則裂大石拔大木有不可禦
者監司之風采亦然故施行之間不可不審志氣雖不

衰而血氣有盛衰耳目聰明一有不及施行之間稍有
差誤則關係甚大而人亦得以窺我矣十年以來朋友
之於國博特以為有德之君子耳自積溪金陵龍舒之
後人皆以為有用之才則今日施行尤宜謹審以全令
名使善類賴以增氣而吾鄉有光矣邵康節云有一人
之人有十人之人有百人之人有千人之人有萬人之
人所謂萬人者以其能盡萬人之長以為一已之長也
今幕中有二李是天相國博以為腹心股肱耳目之助

也願國博虛心誠意以待之凡所施為必咨度而後行
則彼有所聞不傾心而相告者無是理也國博又以所
見與斟酌則何事不濟耶幹嘗竊謂監司以按察為任
且先留意於州縣之官吏頃見章漕在建寧嘗招在書
案無他書但有官員名銜冊舉以相問俾據其所知之
善否優劣以對則自用筆誌之不惟於幹為然每遇相
識必孜孜訪問州縣之間去一賊貪之吏則一州一縣
受其賜一州一縣得一廉勤公敏之人則一州一縣皆

可委以裁決如此則我可以端坐持綱而一道肅然不
惟可以集事而又可以怡神養壽世道窮感人物凋零
有如國博者尤當厚自愛重不宜以細故自弊也一路
人物餘不及盡知吉州萬安有李知縣名東字子賢邵
武人氏頃嘗來考亭從學亦精敏可喜江州德化有王
知縣名貫之字中甫婺州人頃與之同在吳德夫幕中
亦醇實不苟皆可委以事而觀其能陳子華在湖口尤
可托如此之類更宜博訪若每郡得一人則一郡之事

皆可委之或鄰郡之事亦可委送人之冤抑必獲伸政
不必自責效於一身心力耳目之間也大抵江西健訟
成風砍一墳木則以發塚訴男女爭競則以強姦訴指
道旁病死之人為被殺指夜半穿窬之人為強盜如此
之類不一而足仁人君子愛物之念切嫉惡之意深鮮
有不為之動者故凡有訴州縣理斷不當之法莫若且
索案或具因依申不可便予決也若便追人若便送獄
曲直未明而被害已多矣今日之病兵不素練糧不素

儲卒有緩急何以支吾。餘日夜有不恤緯之憂也。兵非漕司所掌糧食一事恐宜加意。今歲江西雖小歉較之常年亦為樂歲。朝廷既不知糴。大家亦有餘粟。更須筭計漕司財賦除起解之外。不若以贏餘委州縣廉明官吏擇稅錢最多人戶平價和糴。或萬石二萬石。隨吾錢之多寡收糴於南昌江濱置倉盛貯。每歲增益。若歲有凶歉則平價出糴。旁郡凶歉可移以賑之。若加之師旅則亦可資以給餉。歲或屢豐則以代輸上流州縣之綱。

運而取其合運之綱米以填入此以新易陳之策也州縣有學最關風教今皆以為文具江西素號人物淵藪比年蕭索尤甚雖時文亦無傑然者而况有學術乎二陸唱為不讀書而可以得道之說士風愈陋不過相與大言以自欺耳學校雖存教授固當教提學豈可不提之耶須是立為規程宿學教授每日必入學諸生讀書必有課程教授點檢其勤怠而賞罰之旬申提學亦間遣有學術德望之人巡視之又以見教授之能否而殿

最之異曰必有人才可為世用此其為益大矣今之為運使者未有知此者也不惟今日數十年亦未有知此者也自我舉之則將有聞風而視效者矣此非細故也與其徒創東湖之美名而不思教養之實義者大相遠絕矣所謂規程者更須熟思之榦今亦欲行之於新淦俟有規模亦可相參考也東湖亦當撥入州學如獄麓之例也今日最急莫如官會最不可不奉行且得先備文榜以告戒之一條戒官吏之蔑視而不奉行者一條

戒百姓之不肯行使者一條戒頑民之誣告把持者三者並行可也至於實政專委李司直巡行體訪李司直耐辛苦不憚奔走而又忠信可托也其法無出於鹽錢若申朝廷乞降下鹽引自販自賣如福建之法與商賈並行人食賤鹽而官得見錢善之善也然世俗多憚煩又難與慮始無心膽必有破其說者其次則莫若先取諸郡之鹽價於隆興前後兩江之所差鹽官遇鹽船至則籍其數仍問其所發賣之地分州縣官為置塲棹積

以純會子還之然後均之鹽鋪拘其見錢所謂鹽客者本以會子買鹽今以會子還之何所不可彼之欲得見錢者不過私下低買官會此最亂法之民也見錢多則官會有可兌之處會價自高矣計無出於此者但其間防閑斟酌便宜與二幕上下共議論也此數事既舉則使臺亦可以安然無事矣最切要是且宜清心省事有張元德甘吉夫處於內有李國錄李司直處於外而國博提其綱領可也天下之寶當與天下共惜之此榦所

以不敢自外而輒進狂言也

復劉師文寶學

甲

餘八月下旬自金陵邸吏遞至台翰並奏藁各一通捧讀驚愕莫知所自未及修謝忽被漢陽之命已而督促就道水陸奔馳凡兩月方達漢陽遂成稽緩不勝恐悚。餘聞之鄙人也稟資庸陋亡以逾人先君以儒素起家至紹興御史以清節為世所推重不肖諸孤恪守先訓罔敢失墜既冠聞晦翁先生以聖賢之學誨後進樞衣

從之始獲粗知治心修身之本末家素窮空孳累猥衆
迨至中年偶得一官奔走州縣亦不過為斗升之計而
推其所聞於父師者而見之行事耳然以狷狹之資不
能同流合汙以自媚於世故其得罪於人者常多然亦
有察其愚直以為粗有足取薦之於朝者凡數人然非
鄉曲之舊知則州縣之屬吏獨端明汪公嘗三見薦於
未嘗識面之日顧閩浙之相去壤地相接是必有為之
遊談者惟閣下在西蜀數千里之外自代之章乃首及

於閩嵩州縣之一小吏以閣下之氣節德業視當世之士固未肯多遜而海內英俊亦豈無足以當論薦者而顧求之於世所擯棄之人此其所以驚愕而莫知所自也非餘之才有以異於人閣下之識見亦非流俗之所能窺測也人之所以自立者亦以天之所以付予於我者不可以不盡其分初未嘗以世之用不用人之知不知而有所加損也顧以衰賤無用之人而乃獨蒙大君子之知遇如此則窮當益堅老當益壯亦不敢不痛自

勉勵也。幹之鄉慕閣下之聲名，非一日之積而未得遂。侍坐函丈之願，丙寅夏從宦於江陵幕府，是時邊事方興，議論之間落落難合。閣下去江陵方數月，幕府之故吏猶在間，有相問勞者，必曰：「使子遇前帥劉公，必將志同氣合而無間也。」幹猶莫能悟其所以言之者已。而徧考前日之所施行，但見吏畏而民安，事修而用足，與其所親見者大異。然後歎其命之窮而所遭之不偶也。孰謂十年之後復蒙知遇之厚，乃如此耶？然雖蒙閣下之

知遇如此而榦之年已六十有三矣去函丈又二千餘里榦以職守所拘無由致其身於大君子之側以慰其生平願見之心則亦有咨嗟太息而已望閣下而不得見榦之衰老又如此則所恃以見其區區之情素者一紙之書耳又何敢以無謂之寒暄不情之稱頌而仰瀆執事者之聽耶故敢併述其愚以求教誨於左右臣子之於君父與生俱生而不可解於心者也食人之祿者當任其事此亦不待智者而後知也數十年來風俗日

異謀身之意多於謀國為私之心急於為公上之人既不能明示好惡以力變之或反推波助瀾使人安之以為當然所謂廉恥節義至是掃地矣國將何恃而能自立耶此無他義理不明而人心不正也閣下其何道以革之耶中夜以思心焉如割尚冀台慈痛為當路者言之

右門擬與兩浙陳運判

夫以一介之賤吏獲隸於賢使者按臨之下於此而不言是終已不得舒憤懣於斯世者也雖然大言之則非

其職之所宜淺言之又恐委瑣不足以瀆使者之聽今如榦之職誠所謂釀數百斛酒辦數千緡錢雖世之庸賈亦能之以使者之賢名必不至使下吏不得以盡其職榦之職瑣瑣而不足以瀆使者之聽也小者不敢言而大者復不敢言姑以賤職之所及而有關於國家之大體者為閣下言之榦聞之生民之命社稷之安危實係焉京畿之民尤所恃以屏翰王室而不可不加恤焉者也今也輟環四方而未有饑窮困苦如浙西之民者

馬姑以二事驗之石門酒課舊額五六萬緡常有餘今也歲解一萬常不足界自若也拍戶自若也而解錢不足者民戶減於昔產業減於昔則因沽酒之少而可以知戶口之少也石門酒庫以灰和糟歲以糞田雖狗彘不食晨開務門老穉累累買糟和糠而食者肩相摩也無錢而求糟以食者常相半焉則因食糟之多而可以知貧民之多也聖天子在上二三大臣所以寬恤民力者無所不至而京畿之小民戶口日減而貧民日衆是

豈不深可憫者乎立國之命在於百姓百姓之重莫急於京畿今乃虛耗貧困一至於此是豈不可深憫者乎
榦少從先生長者遊語及江右人物未嘗不以先大丞相為稱首恭惟某官憂國愛民之意謀王斷國之論得諸家傳而藹然著於縉紳之間主上軫念京畿之小民而付之以輸將之寄此固百姓之所懸命焉者也皇皇者華之詩曰載馳載驅周爰咨詢釋之者曰周徧也言使者之詢訪無所不徧也榦以一介么麼之賤吏其去

民為最近得周旋閭里覽觀風俗而有聞焉故敢不避
僭越之誅輒陳愚瞽以助詢訪之萬一伏惟少垂察焉
若夫賑恤之策經理之方非少知治體不足以知此惟
閣下詳擇焉

勉齋集卷六

欽定四庫全書

勉齋集卷七

宋 黃榦 撰

書

復輔漢卿主管書

昨所論性無善惡心有善惡榦以為性亦可謂之有惡者蓋因明道惡亦不可不謂之性而發益天地之間只是箇陰陽五行其理則為健順五常貫徹古今充塞宇宙捨此之外別無一物亦無一物不是此理以人心言

之未發則無不善已發則善惡形焉然原其所以為惡者亦自此理而發非是別有箇惡與理不相干也若別有箇惡與理不相干又卻是有性外之物也易以陰陽分君子小人周子謂性者剛柔善惡君子小人不同而不出於陰陽善惡不同而不出於剛柔蓋天下未有性外之物也人性本善氣質之稟一昏一明一偏一正故有善惡之不同其明而正者則發無不善昏而偏者則發有善惡然其所以為惡者亦自此理而發也故曰惡

亦不可不謂之性也然人性本善若自一條直路而發則無不善故孟子不但言性善雖才與情亦皆只謂之善及其已發而有善有惡者氣稟不同耳然其所以為惡者亦自此理而發故惡亦不可不謂之性孟子所謂莫非命也程子所謂思慮動作皆天也張子所謂莫非天也陽明勝則德性用陰濁勝則物欲行亦是此意張子曰論氣不論性不明論性不論氣不備故知性之本善又知善惡皆性然後復明且備也更望垂教

上江西運使書

居於其職而不知事之曲直者不智也知其事之曲直而不為之處當者不仁也受人特達之知而無以報之者不忠也報之不以其道而陷人於有過者不義也幹誠閭之鄙人也少不自勵老而無用不自量度乃以一命之微而膺百里之寄百里之內利害休戚皆不容於不關其心也雖事之不至於其前猶當日夜求訪而思有以處之況明知其不可乃坐視而莫之救即舉天下

之士孰無求進之望哉或以佞或以賄或以請託或以親故其求之者非一方也固有求而不得未有不求而自得也榦非不求也自知其衰老而不敢求也部使者之薦舉乃首及於不求之人此古人有言曰以國士遇我以國士報之言各求其稱也一則恩造二則恩造朝夕偃僂於其間伺人之顏色順人之風旨惟恐有失焉者是妾婦之道將順其美若夫正救其失扶持植立不使人有纖毫之玷以成其光明盛大之德者此國士之

報也王氏饒珉之訟榦之所不能曉者也婉婉之弱子
哀號於其前求以奉其母而不得此仁人君子之所宜
動心也然所謂天倫者謂其親疎高下燦然有條而不
可易也以弟而繼兄為子而追母則天倫亂矣非所以
令衆庶見也非所以明道而立教也夫以一偏之詞執
其數十家之族人而指以為教唆者其虛實未可知也
以部使者之嚴追而送之他郡棄其家族奔走道途吏
卒之誅求囹圄之禁繫十數家者必蕩然而失其常產

矣是豈不深可憫耶夫仁人君子之遇事如權衡然益亦平其心而非有所輕重於其間也然毫釐之際有所未察則亦容有不得其平者部使者之威令若雷霆然世有登乎千仞之山聞雷霆之發於太空也隱然如嬰兒之聲及其一震則裂大石折大木舉措之間不可不審也如此此榦之所以日夜思念而不容自默也夫承使者之命而追十數家之人於縣令非有所擾也然為縣令則不容不為百姓慮受人之知則不容不為知己

者慮也苟為不然則不仁不智不忠不義是小人也大君子之門豈容有此無狀之小人哉此榦之所以不避斧鉞之誅而敢有所言也伏惟台慈察其情而加貸宥焉

復李仲詩淮西帥

大東

榦比以蹤跡不能自明遂具事之始末仰溷台聽方懼瀆尊以連罪戾乃蒙顓佺寵賜反覆開曉聞所未聞而又謙抑惻藉如待敵已不勝悚懼不勝感激承諭彼書

是猶欲以結集事嫁其罪於榦也比見有蘓知錄者以
憂歸過此相訪云郭一日呼兩獄推司而問之曰獄案
中如何都不曉及通判獄吏荅云此事與通判不相干
如何敢寫郭大怒令申報判云各勘杖一百知錄徃見
之遂相引入卧內於紙袋中出文書一卷內有一條云
一體究得上件結集事係是黃通判使令知錄云不知
是何人體究憑何人言語既無此事如何敢胡寫通判
便肯休郭遂教令知錄供一狀來云徐師點係妄傳州郡

台示李明之徒想亦是詐傳通判台旨遂判一照字而
今台諭云云則其說尤可信不知朝廷將信帥司之供
責耶抑將信彼之偏辭耶可謂愚之甚也第恐龍圖於
廟堂私劄中未免委曲其詞以致疑惑而不判然別白
言之所以中都相識交以書來相告也若是黃通判與
謀州郡何不將一行人解帥司乃累日抗拒而不發耶
只此一節便自可見其他不辨而自明也台諭每以為
其人姦險可畏榦但見其庸陋愚俗而不見其可畏也

幹愚不肖數受教於當世之君子矣禮義不愆何恤於人言直道而行成敗利鈍一切付之度外又何彼之足畏哉以堂堂大帥乃凜然畏一列郡之繆守此幹之所以不曉也觀前此賜教以為抑於形勢方今朝列皆賢者或遇為人所誤為之移書求薦則有之若其人不足薦不足用明白而告之彼豈不見聽且龍圖之薦人為朝廷耶為形勢耶高郵應守其人自賢又石丈之懿親而丞相之所拔擢一語不合東帥劾而去之誰議其非

者龍圖之威望豈減於東帥今乃如此隱忍回互得無損威望耶果如此則繼今以往高見遠識之士皆不敢曳裾於龍圖之門而形勢之人日至矣今觀彼書有欲引嫌回避之語大府遂有乞遷移通判之奏是為其脅嚇而不自覺也果欲回避則自回避何必見告耶且繼之曰已作劄子達大坡矣是何言語乃敢陳於連帥之前彼其意蓋欲以大坡相恐嚇耶便是同列亦不敢出此語而大帥之威風乃能受此脅嚇耶且彼何等物類

大坡又何嘗眷眷於彼特以虛聲相恐便為之動又有
大於此者則當何如也奏狀中有委有才學之語不知
何者為才何者為學將委實見其有才學耶抑此二字
為形勢而發耶甚非天下之士所望於大君子之門也
經濟之才世不多見如龍圖之襟度忠壯固當以韓范
自期而世之所謂屬望者亦不輕而受制於小人乃如
此此有識所以為之不滿也富貴之來自有定分一門
之中登法從者相踵世固不徒以貴顯望龍圖而以道

德功業望之也。大江之西，賢士大夫如林，持清議者，口若劍戟，故區區之愚忠，更望龍圖持心正大處。已方嚴，是非可否，一切付之公論，而禍福利害，舉不能動吾之心。則此等小人，奉頭鼠竄之不暇，又何敢肆無禮於其上，而以形勢相脅持耶？如此，則道德日以益，功業日以彰，聲名洋溢，西山東湖，當為之改觀矣。榦愚不肖，辱龍圖之愛念者，甚至區區之意，亦但欲修身明道，報知己者，而不敢以功利為心。今龍圖每得書，必勉之曰：旦夕。

必得郡或曰必分符錄不知郡為何物符為何物乃如此利害而屢勤龍圖之開曉耶顏子曾子不試郡不分符將不得為賢人乎天下之士皆必試郡分符而後為可貴耶如此則龍圖亦未為深相知者矣夫子曰不患無位患所以立士亦思所以自立耳而何無位之足患哉大韶大濩森羅乎胸中用之則陳之朝廷薦之郊廟不用則憂擊搏拊於大山長谷之中穹材茂木清韻遺響自以為樂回視人世方且擊甕盜奏淫哇雜優溺何

足聽哉何足戀哉翰所遣丐祠人尚未歸幸而得之更
當買舟絕江長歌痛飲於吳山之上然後歸老武夷山
中不復交於人世矣仰恃寬弘僭陳悞悞言詞激切尚
幸矜照

復交代王寺丞

從

翰比承台翰之賜又辱真染見之別幅詞意鄭重不勝
感刻諛詞賤跡不復重稟惟是交承之契誠非偶然况
又得踵賢者之遺規其為感幸非言所可既也漢陽小

壘介於大國之間士大夫不自愛重往往過自畏怯又
以一葦可航雖守土之官亦絕法出境奔走諸臺諫事
上官不過求知已事苟苴徒舖啜耳想其趨走臺府未
免偃僂屈折於吏書之前以至自損威重以故臺前兵
卒視漢陽如縣吏之視都保耳其肆為無禮計非一朝
一夕之故奉天子命為守豈宜低首下氣奉承此輩耶
自交代丈赫然奮怒執而囚之公議翕然咸以為當大
別秋興自此遂增九鼎之重矣餘也庸懦不武亦得襲

此餘威稍可自振何幸如之何幸如之或者以為州郡不應收禁監司之兵卒天下之惡一也監司兵卒敢以擾州郡而州郡治之是為監司懲惡也何不可之有以太守而敢於治監司兵卒則太守之賢可知又足以明監司之賢然後州郡乃敢如此也此蔡丈一時施行之失當亦自悔之矣吾輩從宦誠非得已不過為貧為義合則留不合則去況事之直在我又何歉之有榦視事已數日茫然未知顛末特每事必照交代丈例施行所

謂步亦步趨亦趨也有可見教者更望不外

復李軍使書

蜀人

幹講聞高誼之日久矣參辰相望願見無由忽承惠書
陳義慷慨詞氣奮厲如驚湍怒濤洶湧奔放不可涯涘
不問可知其為蜀之名士也忠義之心人誰無之顧志
昏於利氣怵於勢則畏懦蓄縮而不能以充此心耳觀
執事之所以自叙豈流俗之所敢望哉顧是非毀譽屬
乎人窮通得喪屬乎天吾惟盡吾此心而已其他皆不

必論也閩蜀相望幾萬里安揚之事固不能盡知而亦
嘗竊聞其略矣柴與之世之所謂善彙而顧若是焉何
哉宜春善地士友亦多可與語惟執事安之而已餘少
不自力老而無成資性狷狹與世多齟齬其窮悴特甚
俾守偏壘年事至此豈能尚隨俗俯仰方上香火之請
裏足窮山杜門掃軌以終餘年安得千尋之綆挈執事
於深淵惟執事安之公道開明晉用有日矣

與劉晦伯侍郎書

幹拙謬無他長平生但知從師友讀書於世事全不通
曉一行試吏亦但知守父兄廉勤之訓此侍郎所熟知
又安知邊防為何事既為此來亦不敢不私自籌度以
愛君憂國為此心之主而一身之利害不敢計至於存
撫百姓相親相愛使如父兄子弟腹心手足入可使守
出可使戰人心既歸則兵之弱者當思所以使之強財
之乏者當思所以使之富城池雖難猝修而要害之地
亦當思所以為老弱保聚之謀南北之限雖有淮河之

阻吾既能探彼之事彼又豈不知吾之虛實哉吾之至忠至誠至仁至信又以服南北之心而又知吾之不可犯則雖羊陸之事恐不出此今北方擾擾內有骨肉之相殘外有強敵之相迫山東河北郡盜蠭起道路不通此豈非諸葛孔明所謂存亡危急之秋耶今托身於人而目之所見皆與心之所謀者不相類天下人物有才智自足以有為者有才智不足而資人以有為者自足有為者當依之資人以有為者當輔之既不足有為而

又訑訑然拒人於千里之外此所以私竊憤懣而亦不敢見之詞色也目今相處亦無他事之小小者亦不敢數言其關係稍大者亦不容不言禮貌往來亦與他郡守貳無異但勢分太尊而情好隔得失太重而猜防深望其松茂栢悅魚川泳而鳥雲飛則決無此也不獨於幹為然而僚屬莫不然也姑以貌相承而已初亦甚覺可駭今則久而安之矣聞不和之說已闕廟堂之聽欲和甚不難但相與為欺君誤國持祿自謀之計則無往

而不和是非可否之相濟乃所以為和也初亦思為避
之計蓋恐其陰相中傷今既頑然聽其自爾也辱侍
郎愛念之深且有甚不可處之慮此亦無不可處者姑
自盡而已餘則付之分也故敢詳及之榦冬至一疾幾
殆稍安即過歷陽鞠獄往反一月胡總卿以檄見招更
兩三日後徧走汭淮數百里巡視守把即過金陵亦得
一見制帥入幕之請恐非寒賤所敢望也區區愚見竊
意邊郵無寧靜之理儻得如侍郎之公忠無我以撫臨

軍民廣謀博聽延攬英豪庶幾有屹然不可拔之勢但從容獻納折衝樽俎自有妙算又不在于東馳西騖也
附此申稟

與胡總卿書

榦比因人行嘗草率具隸人之敬度必闕瀆台聽惟是請違倏忽十閱月拳拳尊慕實切此心自顧寒微朝廷過聽用逾其分氣血日衰去家十五年忽動丘壑之念遂上香火之請不蒙開允俛首於此事簡民醇可以養

病一早可畏種不入土人無益藏朝夕凜然無以為計
計使以監司而守武昌必欲括諸郡之粟以歸一郡制
使以防邊而實遠儲不肯泄遠郡之粟以歸內地漢陽
介於安復武昌之間制使禁安復之米使不得至漢陽
漕使又欲泄安復漢陽之米以濟武昌以故漢陽獨受
其害所幸得旱之初盡捐帑中之積廣糴客米得萬石
而舊積亦有三萬不斗大之郡而有四萬石之積遂可
以安枕而無虞然兩司之交鬪猶未已也計使挾朝廷

之命以持制閫又以閫外之權以令漕司至遣大軍數十人守漢陽之境計使又遷怒以治安復之官吏是何氣象乃若是耶監司之體當如是耶陰陽不和則為旱人事如此何以召天地之和朝廷擇人以安遠而一室之內自相攻擊何以安人心而固吾圉耶世之所謂人物乃如此其豈不大可寒心耶以是益令人動歸去來之興也要之制使之理為直益實塞下之粟事體為重而救一郡之歉亦易為力也亦嘗以為解計臺之意遂

亦併蒙見詆自是只得靜以聽之不敢被髮纓冠而往救也。韓止俟賑濟結局當再申前請得遂從欲則當買舟東下拱聽教誨也。

與蔡總郎書

奎

韓復自向者某官出宰建陽得托受廛之庇因獲晉拜去歲金陵復得預屬吏之末茲承肅將正命榮總餉臺又獲密邇臺治朝夕親承教條視他郡有榮耀焉顧以疎賤僅能具名姓通記府雖一水之阻又不敢越境親

承約束拳拳此心如水東注然區區賤職有不敢不稟
瀆者是以忘其犯分之誅輒自冒昧陳之榦衰晚庸謬
無足比數誤蒙朝廷知遇之厚試邑一年而得倅為倅
一年而得郡此近例所無有不肖何足以當之竭來此
邦民淳事簡日領詞訟不過三五紙晨起治事一二刻
即退終日可以高卧財賦之入不過市井酒稅亦不難
辦真無毫髮可以圖報朝廷知遇之意身雖佚而心實
不遑安也然有一國之地則當有一國之政毫髮有關

則無非太守之罪是豈得以為事簡而自佚哉漢陽雖小郡實與武昌為唇齒丙寅丁卯榦適在武昌武昌之人日夜望漢陽之烽火以為安否孫氏都武昌而使魯肅守漢陽則其為要害可知今乃蕩然無城池之可恃此豈郡守之所敢自安城南俯瞰大江堤岸低薄夏月水漲居民晝夜為之不寧一或潰決則一郡生靈皆為魚矣城池堤岸二事乃郡政之最大者日夜籌度計畫要非郡計所能獨辦俟有成說即具利害方略申朝廷

諸司而目前有不客已之事惟使所可以主張者本軍
軍籍多缺禁軍二百人僅存百二十人多遊手亡命之
徒向來廩給不充聽其朝來暮去自榦到任為之增廩
給然後粗有固志且招填已及百五十人見招是舊額
但無營屋可居徃徃散處民間有營屋二三十間又在
郡山之後荒蕪無人之地深為非便蓋漢陽郡城自紹
興之初殘破之後並無居民岳侯屯兵武昌遂佔郡城
荒地為水軍寨所佔之地居郡城三分之一也水軍七

八百人又皆高燥之地郡中居民皆在卑濕又皆偏仄
無所容居軍學乃在湖水之中同官廨舍往往不能備
猶非利害而禁軍無營寨乃缺典之大者今水軍所居
之地既為寨屋又為房廊既為廨舍又為花園向屯七
八百人則空地甚多同為屯軍水軍之地有餘而禁軍
乃無營寨禁軍之兵無地可居而寄屯之軍其地反多
空閒以彼有餘補此不足公此心而觀之亦無不可者
欲乞某官曲加憐念呼權司而諭之此意或差一屬官

過江相度如果從所請本軍每歲甘出賃金償之亦惟
命是聽么麼小郡非上司力賜主張則雖有趨事赴功
之念亦無以展布

復豐宅之淮西帥

有後

榦備員假守才具淺拙誠無能為獨拳拳宗社之念日
夜憂惻無所控訴昔藝祖數百年之基業江左數百萬
之生靈二帝之游魂無歸八陵之餘憤未洗當彼中衰
殘朝不謀食之際正中原遺黎奚為後我之時以如是

之重任付之當世諸賢浮光之警今又兩月矣未知有
一字施行起人意者想其聞殺却敵人幾名之報上下
舉手相慶又為宴安江沱苟安歲月之計其使人憤懣
欲逃遁山林而不可得也忽聞先發制人之誨不覺喜
欲起舞今日之事甚不易見釁端既開事不容已向者
吾嘗屈已厚幣以事之彼又據有河南北之地志滿意
足故可以和今吾既絕其幣又失河北幽燕之故壤其
勢只得取償於我此豈可更萌屈已求和之謀今既如

此則只有守有戰而已守非易事惟戰乃勝乎守然自
諸賢偷安日久軍政不修百事廢弛將何以戰顧今日
事勢則誠有所謂事半而功倍要在處置得宜耳

勉齋集卷七

欽定四庫全書

勉齋集卷八

宋 黃榦 撰

書

與胡伯量書

榦彖彖賤職無足道身老累重書會所入之薄不足以
自活躬耕非所素習捨是無非有害於義惟有祿仕猶
法令所許君臣不可廢之義竭力盡職食焉無愧故冒
昧為之幸亦職事粗辦上下不相咈可以苟歲月耳但

場務事多無暇讀書浙右之俗專務豪奢初不知讀書
為何事過從絕少講習遂廢是則可恨也契兄與黃寺
丞丈處彼此當相安胡不且少留耶膚仲去歲留此甚
久亦具言相處之適其長子子華今遂登科矣恐欲知
之李余二兄力學如此可喜近有自彼來者乃云敬子
捨祿仕而放債以為活豈亦惡之者之言耶不知其生
事何如如他無以為活卻不若丐祠之為愈也

榦衰晚之蹤奪於兒女之累不得一意卒所業朝夕憂

歎虛度此生若不為擺脫之計日度一日溘然而逝與
枯朽何異兒女十人一兒一女已婚嫁次女亦已
許人今秋可了更四男子次子輔年已二十三矣懵然
無所知然亦幸其靜重知讀書但頑鈍之甚留之膝下
無朋友過從嘗欲遣之遠遊以交於四方之賢者而廣
其聞見深以未得師為念今乃聞契兄寓筠陽去此十
舍而近敬遣之趨函丈望借一寺舍僧房近郡治者與
之處誨之以所當讀之書每四五日一呼而教之為之

檢點課程不惟使之識義理不為小人之歸亦望之使之多聞博識進可以應舉退可以為書會以不失其衣食之計榦家世窮空兄弟子姪輩皆須自撐拄以為活非有父兄之業可席以為安也若其可教望收置席下雖三五年無害也此亦月遣人送資糧以與之榦老矣一二年間亦有卜處康廬之意得此子先父於彼中相識異日亦得以老此身也萬望垂念

李憲相約為章貢之行已治裝戒行邑人苛留不忍相

捨此亦為之痛徹心肺以此憂慮熏心幾成大病只得
力辭之未知其肯相從否衰晚絕念世故但得一日之
閒且為卒業之計豈敢更當此重委若以此得罪而去
亦所甘心也昨承示借先師遺訓已囑小兒輩謹護不
敢損失承許以夏初見訪俟有的信當遣舟奉迎輒孫
偶以去私留此只得且以付之蒙示及楊敬仲語此自
是二陸門戶其學者之說大抵如此專欲上門把人長
短又須勒令其人從其說誠足以聳動人聽然久而思

之意味殊短契兄欲以某坐某行言之則又恐非其指
意亦恐未盡其某坐某行之意也國秀兄之說似為得
之恨以事冗不得深思再以求教也

榦一身百慮至上饒又且不免還家看孥累米價大貴
四壁蕭然求欲退安丘壑而不可得旦夕又當一出抑
何時而已耶回首諸公徒切健美大學首章無他疑但
向者以為明德之發於外者昭著而不可掩也今之解
注乃存於中者洞徹而無所蔽也故鄙意以為莫若合

內外而言之虛靈指存於中者而言昭著指發於外者而言如輝光之類皆指外者而言之今既未能不疑且守師言就本領上看尤為有味也義理無窮安得朝夕相依以扣請所未聞耶

明德只得如章句所說然其間亦難看更以格字致字誠字正字修字與明字相參見得分曉方理會得先生指意不然只是侏儒觀優也餘年益老日益昏每念先生諸書向來極欲說得平易使人易曉然今所曉者又

只是見得皮殼殊可歎也。悉俟面言之。近因與蔡兄元思論西銘頗痛快。敬子當能言之。餘俟騎氣之來耳。

榦本是村秀才。卻被捉從此來。又不免別換頭面。為之說法。日尋羣豪為騎射雄飲之習。老矣不足追逐。然舊病卻自來。此為之頓減。亦是頑骨合有許多辛苦分也。諸事已見敬子兄書中。向使真得一方之地。使自展布。亦當有可觀局促。隨人後亦頗覺費力耳。亦只得尋不侵官不犯分事。為之使吾之志得行。而彼不覺耳。然孰

若安坐讀書之為樂也兩子來此卻得課之讀書其他無可交游者益此間所習者騎射耳不知有詩書也

承教持守之方別恐亦無他說前輩及先師言之詳矣亦只是不為與為之不力耳然亦有一說致知持敬兩事相發人心如火遇木即焚遇事即應惟於世間利害得喪及一切好樂見得分明則此心亦自然不為之動而所謂持守者始易為力若利欲為此心之主則雖是強加控制此心隨所動而發恐亦不易遏也便使強制

得下病根不除如以石壓草石去而草復生矣此不可
不察也不知高明以為如何榦老矣未能忘祿非祿之
不可忘也不仰祿則又須別求所以餬其口而勞心害
義反甚於仰祿以是東西南北惟命是從何去就出處
之敢言何功名事業之敢望特汨沒世俗學問盡廢大
為師門之罪人不敢自文也敬子果如何來書所謂甚
費造化斷不可辭此語卻與向來議論不同今之出仕
只是仰祿不得已若謂合義則非所敢聞只管如此立

說卻似浙間議論也又不知高明以為如何敬子既是應舉得官又家貧未能不仕從之亦無害也

前日之事乃知諸公醞釀甚久惟恐其來故競起而攻之要之不能阿世徇俗尚復俛首從官此當自責也第因此遂得裹足山樊杜門絕交一意安靜以終餘年又莫大之幸也南康已成聚落臨川氣象方張此間亦有朋友自為保社講習益明不至於微言絕而大義乖亦先師所望於吾輩也尊意只得屈意徃白鹿且以吾道

卷八
為念收拾得十數人使此道不至湮晦最急務也陳守
胸懷坦然無一毫私欲之累於學問雖未甚加功然其
資其志不可及也此而不可相處則亦難乎望於今之
世矣

日來講學想日有新功朱先生集前修之大成設教垂
世其大綱無以復加矣顧學者之為學則亦須隨其氣
質察其所偏與其所未至擇其最切者而用吾力焉譬
如用藥古人方書亦言其大法耳而病證多端則亦須

對證而謹擇之也。榦衰老多病於諸書亦不能泛讀矣。心身閨庭之間是則學問之大端朝夕孜孜惟此而已。朋友講習則絕難其人也。

復胡伯量書

承誨以朋友講問之詳甚幸甚。喜榦之愚陋何足以折衷之所說大抵皆善。人心道心之說恐如契兄所云者。為是李所謂人心氣也。余所謂性之正者皆未精確也。道體之說此更宜講究。謂但指隱而言者豈所以為道。

體之全耶體字不可以體用言如今所謂國體治體文體字體亦曷嘗對用而言耶所謂道體者無物不在無時不然流行發用無少間斷如曾哲者真是見得此理然後從容自得自以自樂今之局促迫狹尋行數墨輒拘礙者豈亦於此有未灑然者耶主敬致知兩事相為經緯但言敬而不能有所見者恐亦於此有所未思耳此有非紙筆所能盡者試以扣余李二兄共商確之安得一見相與劇言耶恐有未安者卻望垂教為幸

幹偶當一職自不敢苟以是亦粗辦不然亦豈不能虛
竊廩粟以活孥累耶承見教講學大畧足見勤篤師友
所望道體之說前已具所聞求教矣未審是否持守之
方無出主敬前輩所謂常惺惺法已是將持敬人心胸
內事摹寫出了更要去上面生支節只恐支離無緣脫
灑所謂座右銘四句者不知先師文集有耶抑故友程
君之語也是必非夫子之言若程君思索所到則恐畫
蛇尋足愈支離而愈鶻突矣安得起之九原之下一扣

所疑耶易本義不暇細觀但先天六十四卦圓圖已大錯繆所謂有小圈者特其小失耳今以印策論之則印策中縫之左即乾卦其右即姤卦乾姤二卦夾在策縫左右乃今所印本恒巽之位即先天乾姤之位也乾姤居正南坤復居正北故曰冬至子之半是也若今所印則冬至在亥子之間矣知乾姤在策縫之中則伏羲八卦圖以乾為南以坤為北可以類推矣此乃易之宗祖宜亟正之又圓圖後語有圓布者有方布者則六十四

卦圓圖之中當有方圖豈可有其語而無其圖耶榦以
貧故無筆力且在考亭借書以讀以故無本然此大節
目則可以默識不可便流轉以誤後學也

聞果州兄之病令人終日憂惱又是幾百十年復生得
一人如此況當人物衰微微言將絕之際豈宜如此不
知此數日又如何朝夕引領以望音信及得音信則又
驚悸不敢開緘為之奈何諸兄更宜朝夕視之且以寬
釋其意也西沂之計且宜遲之榦在此陳師復又來皆

可差人去使喚及其他委使亦可効力若解舟之後朋友皆不在側萬里修途不得不為之慮也

與胡伯履西園書

幹賤跡如舊去冬復為此來更兩三日即理歸裝頑鈍無寸進特此志未衰爾義理精微玩索之久漸覺前日用工之疎然又安知異日之視今不猶今之視昔耶亦有刻意竭力以不負此心而已道難明而易晦彼馳心俗學畧無見解者是誠無望焉爾有志於道者又率多

自執已見安於速成然於聖賢之學不可以毫釐差者
其為亡羊一也以是益覺師友講貫虚心求益不可須
臾忘也此間朋友往來甚多但悠悠不能自奮者亦不
少每念契兄剛毅果敢未嘗不敬慕恨朝夕不得承誨
論君舉陳大於大經大本固難責以盡合然聞於其制
度考證亦頗有過人處善取人者亦資其長以益已而
已

復胡叔器書

幹兩歲奔走相望益遠無從晉記人來兩辱書誨不勝
感慰吾輩年益老百事皆不足關心惟力進此道以無
負師門為幸進道之要固多端且刊落世間許多利欲
外慕見得榮辱是非得失利害皆不足道只有直截此
心無愧無懼方且見之動靜語默皆是道理不然則浮
湛出入渾殺膠擾無益於己見窺於人甚可畏也幹衰
老冒昧此來只是為貧別無他事日來覺得氣血大不
如前已上丐祠之請不蒙報可欲歸未能意思昏悶此

間本事簡偶值大旱頗覺勞心若得早歸靜坐讀書莫大之幸也

復葉味道書

榦象象如昨衰晚冒昧初以事簡為幸忽值大旱不遑寧處所幸方旱之初便積得米以為後日之地以是其憂稍寬但事變之來不可預料亦不容安枕也老來但覺來日無多亟上丐祠之請不蒙聽從然亦可以為歲終再請之地也語錄事承見諭然亦有一說且如語錄

中所載與四書不同者便徑削去則朱先生所集程先生語錄胡為兩說不同而亦皆采取耶天下義理正未可如此看也雖朱先生不敢以自安而學者乃欲率然如此何耶朱先生一部論語直解到死自今觀之亦覺有未安處且如不亦君子乎一句乃是第一段幾番改過今觀程子云不見是而無悶乃所謂君子是不愠然後君子也朱先生云故惟成德者能之則是君子然後不愠以悅樂兩句例之則須是如程子之說方為穩當

敏於事而慎於言朱先生云敏於事者勉其所不足慎於言者不敢盡其所有餘此用中庸有餘不敢盡之語然所謂慎者非以其有餘而慎之也慎字本無不敢盡之意事難行故當勉言易肆故當慎耳人而無信一章其何以行之哉何以之以便當用其何以觀例志道據德依仁不當作次第說若作次第說則游藝有所不通且有志道者未能據德據德者未能依仁之病道者貫古今塞天地人所共由志者存之而不忘德則行道而

有得於身隨其所得守之而不失仁者心之全體德由此立道由此行故當依之而不違三者皆人所不可須臾離若藝則游之而已此一段乃近見一朋友語錄中所載又豈可以其與四書不合而削之乎義理無窮正可憂正可懼不可執一說而遂以為安也似此數處皆是近日見諸君子讀論語而得之今既刊削如此亦無可奈何但乞存留底本見示併求新改本更一觀耳序文讀之全不成言語留此人十餘日欲修改去竟以事

奪又以暑熱不可言旦夕專人送去諸事已見李文書
中

問小德川流大德敦化與萬物統體一太極一物各具
一太極是同是別或云大德敦化是天命之謂性小德
川流是率性之謂道或云大德是語大莫能載小德是
語小莫能破此兩意是同是別

天生烝民有物有則民之秉彝好是懿德四句如何既
說物則又說秉彝又說好德則也彝也德也是一是二

語脈如何相貫

榦昨以鄙見所疑奉質今觀所荅頗似未安孟子曰博學而詳說之將以反說約也聖賢千言萬語雖似不同而其至約處未嘗或異今只隨句解析而不見其統會之一則恐於吾日用之間參前倚衡未必有所見此不但文義之不通而已也道之在天下一體一用而已體則一本用則萬殊一本者天命之性萬殊者率性之道天命之性即大德之教化率性之道即小德之川流惟

其大德之敷化所以語大莫能載惟其小德之川流所以語小莫能破語大莫能載是萬物統體一太極也語小莫能破是一物各具一太極也萬物統體一太極此天下無性外之物也一物各具一太極此性無不在也尊德性所以存心而極乎道體之大道問學所以致知而盡乎道體之細自性觀之萬物只是一樣自道觀之一物各是一樣惟其只是一樣故但存此心而萬事萬物之理無不完具惟其各是一樣故須窮理致知而萬

事萬物之理方始貫通以此推之聖賢言語更相發明只是一義豈不自博而反約哉天生烝民有物有則於民之下又言有物者何也有物者就人身上有耳有目有手有足有君臣有父子之類而言也有此等物便有此當然之則如耳聰目明手恭足重君仁臣忠父慈子孝之類是也然此當然之則固無物不體而此理之妙實根於人性之本然惟人之生各稟此有常之性所以應事接物皆好此美德而不容已也所謂美德即所謂

物之則也其曰好是懿德是云者即指上文有則而言也孔子又加一必字於有則之上加一故字於好是之上其旨愈明矣劉子曰民受天地之中以生是以有動作禮義威儀之則亦此意也若不如是看得文理明順則謂之同者鵲突而無別謂之異者支離而不通矣幹嘗謂此四句便該括了中庸大學論語孟子許多說話非大聖人不能言也自有天地以來如人心道心四句及此四句皆是天心正法傳授世人不可輕將尋常詩

句讀過也且如大德小德亦只是此意秉彝便是大德
好德便是小德世間只是一個道理也朋友難得相近
故痛言之未知是否

榦前日附去諸兄往復之語今承見教大抵榦之說失
之合一而無別諸兄之說失之離析而無統更取朱先
生太極圖解以統體太極為天下無性外之物以各具
太極為性無不在之語并中庸尊德性道問學注觀之
不知如何如前日鄙見亦覺未安統體太極各具太極

則兼體用畢竟統體底又是體各具底又是用有統體底太極則做出各具底太極語大語小則全指用而言畢竟語大底是全體語小底是用天命謂性是未發畢竟是體率性謂道是人所常行畢竟是用大德而能敦化畢竟是體小德而川流畢竟是用若淺看則一段是一段更深入思量則又覺相似都湊不知如何中夜思之更無著落諸兄精力過人更為思之以見教幸甚

復李公晦書

來教謂喜怒哀樂屬於人心為未當必欲以由聲色臭味而喜怒哀樂者為人心由仁義禮智而喜怒哀樂者為道心以經文義理考之竊恐不然朱先生中庸序云人心發於形氣之私道心原於性命之正形氣在我如耳目鼻口是也聲色臭味在物豈得以發於聲色臭味者為人心乎朱先生云雖上智不能無人心今以由聲色臭味而喜怒哀樂則是聖人未免於逐物也而可乎謂由仁義禮智而喜怒哀樂者為道心則鄉黨一篇委

蛇曲折煥乎其文章莫匪由仁義禮智而發也曷為而
以道心為惟微乎人指此身而言道指此理而言發於
此身者則如喜怒哀樂是也發於此理者則仁義禮智
是也若必謂喜怒哀樂而為道心則理與氣混然而
無別矣故以喜怒哀樂為人心者以其發於形氣之私
也以仁義禮智為道心者以其原於性命之正也人心
道心相對而言猶易之言器與道孟子之言氣與義也
人心既危而易陷道心復微而難明故當精以察之則

喜怒哀樂之間皆見其有當然之則又當一以守之使之無一念而不合乎當然之則然後信能守其中而不失也似此可謂大段明白未審高明以為如何更幸詳以見教

真丈所刊近思小學皆已得之後語亦得拜讀先近思而後四子卻不見朱先生有此語陳安卿所謂近思四子之階梯亦不知何所據而云朱先生以大學為先者特以為學之法其條目綱領莫如此書耳若近思則無

所不載不應在大學之先至於首卷則嘗見先生說其
初本不欲立此一卷後來覺得無頭只得存之今近思
反成遠思也以故二先生之序皆寓此意亦可見矣今
觀學者若不識本領亦是無下手處如安卿之論亦善
但非先師之意若善學者亦無所不可也孔門教人只
說博文約禮至子思首言天命之謂性孟子首言性善
是或一意也

所擬近思數條言仁一也或在首卷矣而仁之道只消

道一公字乃在第二卷者首卷狀仁之德公字乃為仁之法所以屬次卷義利之辨不在第二卷而在第七卷者第三卷只論為學之法若是利則不可以為學矣如孟子言舜跖之分則跖豈可以學論哉四子之序以大學語孟中庸為次近思乃雜詩書於語孟之後專言四子則不及詩書泛言讀書則雜以詩書亦各是一意於學者用功初不相悖也義理有疑一段而重出此卻可疑但濯去舊見以來新意此句於學者讀書之法頗精

密故先言之最後劄記之語稍淺近故列之於後然不
重出前數語則又不成文理此不妨重出也致知在主
敬前亦當如此若大學或問先以持敬補小學而後及
大學則與此不同然若不致知則又不知持敬為何事
耶先生嘗云居敬以立其本窮理以致其知本立而知
益明知精而本益固則亦不妨其互相為先後也凡此
皆非大義所係但覺近思舊本二先生所共編次之日
未嘗立為門目其初固有此意而未嘗立此字後來見

金華朋友方撰出此門目想是聞二先生之說或是料想而為之今乃著為門目若二先生之所自立者則氣象不佳亦非舊書所有不若削去而別為數語載此門目使讀書者知其如此而不失此書之舊為佳試與真丈言之如何通鑑綱目昨見舊本只是周威烈前數段有諸國征伐至殺戮十數萬人者皆不載嘗以稟先生答云此豈可不載遂添得數段後欲重修而未暇也如此大部帙其間豈無踈漏處然其大經大法則正大的


確非前輩諸儒所能及也僭易及之更幸賜教

與
失名

三才之植立萬化之流行自一息至於不可終窮自一毫至於不可限量所以綱維主宰者道而已道非他行天理之當然不離於人欲之私而已自古帝王參天地贊化育更堯舜禹湯六七君上下數百千年致治之盛常如一日豈有出於此道之外哉詩書載籍之傳其詳可睹也春秋戰國以來異論滋熾其術愈工其說愈巧

其效愈邈彼豈不知聖帝明王豐功偉績之可慕哉陷
人欲之私而昧天理之正帝王體統卒以泯沒而民生
不見隆古之盛千有餘年於此矣可勝嘆哉循乎道者
如此戾乎道者如彼然則有志於世者其轍迹可考也
然道之在天下與三才並立萬化並行雖顯晦不同未
嘗亡也神而明之其惟人乎人以一身任斯道之責其
要有三吾心之靈萬善畢備察識存養以立其本詩書
載籍嘉言具列玩索涵泳以博其知賢人君子懷才抱

德量其小大皆有可取搜羅振拔以廣其輔循是三者而固守之道之不明非所患也然處世有窮通致力有難易巖穴幽隱之士刻意勵行以有志斯道亦足以獨善其身惟夫君相之尊公侯之貴天下之所觀瞻人心之所趨向誠能篤意於斯道則措天下於泰山之安壯國勢於九鼎之重直反掌耳是則榦之所以有望於閣下也



勉齋集卷八

欽定四庫全書

集部

勉齋集卷

九至
十一

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官中書臣王家賓

謄錄監生臣陸肇脩

欽定四庫全書

勉齋集卷九

宋 黃榦 撰

書

與鄭成叔書

榦同朋友寓蕭寺終日無來人乃知山居之樂如此入城千萬枉道下訪也承諭記文筆力低弱不足以發明尊丈宣義家庭之訓與賢昆弟相與之情更幸改抹看如何一覽棄去可也記中欲知其為某人家不得不

書人表德甚皇恐父前子名則又不得不書名僭越之

甚

紹熙壬子夏成叔請怡閣記也

傳諭尊文宣義眷睠之意甚厚秋深當走求瞻拜無益之書不敢先瀆侍次望道謝意何日復入城近與朋友看博議見其考事說理頗有可觀反為衍辭華語所汨沒間亦有非出一手者妄意刪去三取其一似稍可觀已祝望之攜呈試為一覽有可疑者幸相往復成叔之敏不過一閱也

餘昨入城特留一兩日復入山今尚可為半月之留漸
迫俗務不容久享清福也朋友去盡雖無講切亦頗得
自溫習業與世違不足道也昨望之歸以一書附之浼
達不審曾至否子羽尚未來秋試甚近計淬厲日進以
成叔詞氣當無復堅敵但更放平令明白如白居易詩
雖婆子亦可曉庶讀者不甚費思索耳不知如何但餘
豈足議及此耶久旱風雨可畏近城兩熟之田皆無所
傷想並海殊為此撓於收刈無阻否所在或水或蝗天

災異甚肉食者殊不為動心也榦試後多事欲再尋入山之盟而未能筆硯已生埃矣朋友盡散獨謙之數往來耳何日入城得請教論邪儀禮編次殊未有倫理得一二朋友如成叔之敏為兩三日之集則此意可遂矣榦日因多事不得專意講習為懼承日課詩禮計有新功世間事無不當讀况涵泳持久以養情性者乎但語孟近思是初讀書用工緊要處須是熟讀精思真可聖賢意思則以此讀世間書是非得失方有尺度不至於

泛然徒為誦記而已此皆前輩所已言承問輒及之詩
集傳刊本不及見此卻有寫本偶鄭子立借去俟其送
至當納去東萊詩記與詩傳雖多不同然意思寬博從
容卻亦頗有益

幹明日遂行上元前度可抵家需詩傳適迫行忙冗亦
徧尋偶文集散亂竟尋未得幹不久即歸抄錄未晚也
儀禮原不曾點併俟他日

幹抵此諸況如昨但日俟家兄之報以決行期先銘非

淺陋所能稱述以友誼之厚亦欲勉強復迫多事愧未能如期耳買書亦偶未印就彥忠行急併俟後便也

慶元

丙辰先生是歲
自晦翁所還里

幹罪逆天先妣塋事有日欲啟先人舊壙舉以合塋棺為水所舂撞雖幸無他然歌側已甚有人子所不忍見者苦哉痛哉不孝之罪何以自贖兄弟相視方知擇地不可不審家兄頃亦不以風水為意至此方大懼新卜地特出家兄之見開穴未數尺已有涓涓之狀矣以

此遂姑遲之然家兄嫉李通彥忠之說如仇讐雖有百口莫能開釋付之俗師卜之淫鬼終恐復蹈前轍無可言者身屬卑幼熟諫不從只得聽順中間憂悶不能食者數日幾至委頓今卻幸稍能支吾以視大事之畢百況如此亦不如無生也考亭先生中間得書一病幾不可救已遣書相問矣近卻已安近聞詆排之意復熾不知竟如何此間朋友十數人卻皆謹愿純靜有可共學之資以科舉在近皆未暇講習聞家塾相聚者衆想極

有美質聞望之在彼幸為致意試前能一來山間訪問
生死否 戊午

承許下訪兼聞昆仲偕來慰幸之甚禮書之成有日矣
所借善書行者二人亦約上元後到此得如期同點檢
與之抄錄為幸張樓不難區處潘百二哥今日亦來相
訪大率朋友來者皆以朋友來集且歸若成叔之來當
呼致之林公度潘謙之度亦月半間此來亦一盛集也

已未春成叔遣其季
弟周父來從先生學

幹禍患餘生心力凋耗此間事緒不一終日應酬無少
暇遇休日且得休歇喪禮尚未暇修整禮圖已略觀更
須相見更相詰難方見定論自舉業為士子錮疾不惟
義理全不明而文字亦全無綱紀補緝姜弱亦無次序
如醉人說話滔滔皆是也如昆仲真讀本分書實可為
後生法也此中兩般人有一種直可與講理義者有
一種亦只得令渠讀經史及古人文字勉令飭行作世
間好人耳近卻頗似整齊彼此意思亦漸相孚矣長溪

楊丞通老來此此人卻是武夷門朴實做工夫人無一點世俗態信道甚篤深可敬重度更留此半月餘不知成叔能及見之否若撥冗一來住兩三日亦佳

餘祥祭在近意緒摧割且日與後生習無益之業尤無好況朋友講習者亦苦無堅強奮發之意此道不明二三十年方得二三大儒講明以大振墜緒欲一一以望之世人亦難矣但一向如此則斯文之不喪者幾希昆仲不讀世間書異日相從於寂寞之濱者賴有此耳類

禮此間全不暇看大祥在七月初九日榦欲七月初一日即請一二長上權齋榦即攜喪禮登箕山作十日工夫了卻此一事若彼時得成叔肯來須省得大半功力也不知如何早望示報周禮雖且編得到地官一半然覺得亦成倫理可觀今歲若了得此一書亦是一事此間亦有前輩三四家說略無足采者以是益覺此書不可不成也異日更得成叔修成所編禮記以配此書更編得祭禮以配喪禮亦可以少裨世教也

幹祥祭在即哀慕何窮衰瘁日甚他無可言者家兄一
房欲移歸城借屋以居私竊不便只得移朋友就陳膚
仲舊屋一兩日須可移朋友多歸無復講習之益可以
整治喪禮適建寧有專人來又了數日書問擾擾不可
言小卷已了即可附來此中呼書工錄出如未畢且將
所移喪服制度注疏見示欲添成此一篇也大祥鄉人
例用忌日或疑不得二十五月足日之數不知如何試
為思之

榦祥祭甫畢哀慕尚深以家兄一房在山間未歸葺治屋舍以俟其還遂暫移朋友於庸仲故居方此擾擾又聞池陽余景思之訃殊可傷悼辦遣一僕往迎護其喪以是尤覺多事自顧荒陋恨無以謝朋友遠來相聚之意日月如流此去整整只有百日即東西南北矣八月一日課諸兄說易一卦孟子兩板休日畢集於僧舍設湯餅供輪請六七人覆講不通者罰從容終日而罷粗覺意思不惡承許月半後此來當不爽約也類禮日夜

在念此兩日方得下手喪大記及士喪禮已看過只是多令互見而注疏只出一處如此亦不甚繁更旬日亦可下手抄寫但如孟子答滕文公段子之類亦合入但未有頓放處更容盡抄出諸經如顧命之類皆抄入乃佳荀子左氏傳之類卻別作外傳也更得從者早來相與詰難庶有至當之論也二十五月而大祥頃亦檢尋皆無所考後見司馬公卻於忌月前一月之末卜忌月內一日祥祭設使忌日在二十九日而卜得初二日

則尚不滿二十四月只有七百日而大祥矣不知司馬公何所據然大祥必須卜日又不知於何日方卜前日先妣大祥只於忌後一日祥祭又不知果合禮經否大帶初理鄭注及疏亦疑其如來諭云云但士緇辟二寸再繚四寸兩句卻以緇辟為句絕二寸又自為一句似不成文理陳氏禮書卻云二寸者只是緇辟闊二寸裨垂者只是裨其下端二寸耳其說又謂約組三寸不應帶反細於組其說亦似有理如此則再繚四寸者恐是

兩面皆緣二寸則共為四寸是否不知如何玉藻最是說帶處脫爛不可復考也今禮書書帶多於腰間正結處作兩紐如環注疏又不及此不知後人何所見而云王侍郎遂以為此即所謂紐也亦恐未必然耳疏中所謂裨其一垂者初亦恐如來諭或恐一垂只言不裨腰間而裨其垂皆不可復考也

陳太丘趙苞二事鄙見亦只如此但趙苞事更索區處使一郡生靈不至魚肉鮮卑不至衝突乃是若只了得

自身而百事皆放倒以為乘障安邊付之能者何不早
為此言而誤人國家事哉要之古人立為危邦不入亂
邦不居之法亦正慮其異日之難處也孝叔素聞其豪
宕有奇氣每以不得一見為恨今乃得竊觀餘論甚幸
甚慰但不曉包承小人之法如何昨讀管見方疑胡公
氣蓋一世乃獨為此等議論不謂孝叔生平有豪名而
亦為此言也幹比讀東漢黨人事便雖變易姓名為人
傭作以避禍及變易姓名往來京師多所營救故一時

善類全宥者多如此等人物已覺不甚滿人意不行乎
此心之正而崎嶇以求苟免者皆不樂天順命也奴僕
熏肉之餘竊弄人主之威福天惡神怒而豪傑之士恨
不剗刃其腹乃以士大夫而為中常侍之弔客豈但枉
尋直尺而已哉包承者小人之所以吉也若大人則身
雖否而道則亨矣此大易之本旨也更徃復以質其是
否乃佳

餘諸況如昨但漸覺多事不得一意讀書為撓誌文後

別改定數處亦只是刪去冗辭今所指摘數處極是俟
改正即托舜和書之但既不足以發揮潛德又豈足以
刊之堅珉也哉

已未春成叔有外祖母之
喪此時求墓誌於先生也

榦頗苦多事七家兄方遣女六家兄復治行墳禁之訟
復興撓不可言更旬日後又自為治裝之計矣相別無
月日為之悵然後月廿日以前更能一來與朋友相聚
否此間三五同舍天資粹美志向堅確其他亦大率循
循雅飭榦之荒陋又愧見之故尤望成叔一來與之相

金川先生集卷九
款以別也令外祖母節志之高鄙文不足以稱之又加以勒石重自愧耳

榦入栗山因訪必大過節方歸治行冗擾不可言自惟不才竊聞先生長者之餘論不為鄉人朋友所鄙棄復欲與之為筆硯之交義不容辭開正又復東下但處非其位尚賴成叔諸兄相與維持得不至踈脫為幸世俗淺薄深恐因此遂蹈悔尤也然天理人心有不可泯滅者擇其善者相與勸勉亦足以少助吾道之勢耳

餘諸況如昨病軀漸向安然亦未十分脫體亦漸可觀
書矣師亡友散所恃者書冊矣益不敢不自勉也昆仲
相聚日有新功應舉工夫不可不勉得失窮通則勿以
累其胸次為佳不然則與庸人何異哉人家之興替人
命之亨否固有定命也鄉間朋友漸知趨向者多更賴
成叔振拔激昂之使師傳不廢莫大之幸也人生無幾
米鹽瑣碎不足以浼吾靈臺也近偶思九月以下之喪
除服月日先儒所未說漫記一段託望之錄呈試一觀

是否幸見教

庚申

榦一歲之中災禍沓至餘殃未殄半月來疽發右臂徹
夜痛楚心煩意亂亦幾不救然禍患更嘗已熟亦不知
死之可畏而生之可樂也先兄一房存沒留寓於此為
計甚深而親故莫能悟也歲晚當一歸為先兄辦葬事
須得一見

榦諸況如昨無足言者俟先生掩壙後即歸度十二月
初五六間到家不知能一出相聚否諸事悉面言茲不

暇及但有一事陳彥忠以九月廿四日死於建寧之客舍無以為棺斂之資嘗率此間親故助之矣然後事可慮者甚多鄙意欲得成叔為之糾率鄉間朋友嘗與彥忠往來者如寅伯大哥舜和謙之子立履之用之諸人裒金以賙之此已馳書懇潘溥之矣彼中惟成叔與之最厚當為勸首亦須稍厚乃可此事不可緩若得之不可付其家恐妄用只遞來此間或留以俟榦之歸可也榦以先兄一房欲歸亦以未墓不容不歸既歸又不容

遽舍之去遂決意就栗山之招然栗山去箕山與城中
正相等身拘書院亦率一月方得一歸箕山歸亦一日
復回不能久留以是事多有不滿人意處甚以為撓榦
又棄家遠在數百里外其况味可知所幸朱家兄弟皆
在家庶免後慮耳聞昆仲淬厲甚力此吾人本分事不
可不留心此間朋友亦只得課之作舉業以應試不敢
為高論以誤之也間亦有一二人甘心不習舉業而留
意於所謂偽者此亦難盡以責人也彥忠後事與之區

處稍成倫理亦率得官券八十道以助之但亦尚欠得一兩月糧承欲為糾率若得十餘千以助之亦佳偶有建陽人在此已報渠子弟矣千萬蚤為辦此邇來城中諸公次第未必可率也近得渠子弟書卻頗能自守此差慰人意耳此間朋友甚思一見成叔若得五七日暇只取連江湯裏借問入溪路則至此不遠矣

榦山居甚適但朋友日課舉業講切殆廢為可懼耳七月半間亦暫歸建陽八月半前復來此試前當得款聽

教誨也少意昨承許為陳彥忠作擅越昨已報其家令作十四五千主張矣其家已就妻兄處借去未令妻兄就此支錢用不知如何或隨多少看得若干六月末旬內借一人送來為佳恐榦七月內行期不定早得此錢使用度成叔必不忘掛劍之義也

榦衰晚試邑不敢憚勞歲月倏忽已一考半矣所幸上下相安可以逃責但思學業之不進齒髮之日衰又為

可慮耳

嘉定己巳
時宰臨川

榦素不治生業孳累日衆齒髮日衰又不能坐視其啼
號冒昧試邑以求升斗之給不習為吏一切自為法度
但知無一民不當愛無一事不當理日夜勞瘁無頃刻
寧以是行年六十有一而衰態可畏又居官無蓄積還
家又復匱乏去歲之夏一至中都部吏以為文字不員
遂注令闕以歸已絕意京秩矣冬初二故人官於中
都者又謂可以料理使其復來留滯於此已半年矣班
引之後注闕甚難

壬申先生在京
注新塗宰時書

榦請違甚久奔走官涂人事曠廢久缺晉記尚是癸酉
年秋間解后令似於清江舟中得熟知動靜之常便中
忽拜誨字之辱反復數四不勝欣懌乃知琴書寓都城
長才遠識尚爾淹回造物固大有所成就邪榦衰老與
世寡偶甘就閒退朝廷見念尚畀祠祿粗足自給志願
畢矣還考亭寓居已五十日矣亦欲一歸里中省墳墓
尚以牽制未能動勢須少俟秋涼也

丙子先生罷漢陽
守奉祠居考亭是

冬歸鄉成叔時在
東府鄭景紹書院

餘諸况粗遣無足道者惟區處家事今粗有條理則可
以安居靜養以送此生耳偶有少稟知縣家兄位小姪
子自知孤貧刻意向學偶因子方姪入都遂附之行欲
經營漕試日子已迫不知尚可圖否且此子怯弱踈拙
心甚念之又不欲尼其行已為作林宗魯潘謙之書囑
之矣恐尊兄有能為之地者蒙介念甚幸家兄頃丞沙
邑大參方親迎亦嘗獲拜識不敢令其輒扣賓謁家兄
之孝友清苦人所共知若能為宛轉使不至冒暑徒行

幸甚

榦抵家兩月餘日望騎氣之至近聞膚仲兄乃知為子
華所誤及得來教又知體候亦少不安吾輩縱浪大化
中凡事豈能盡如人意要使在我有定見而彼之往來
吾前者千態萬狀不足以為吾累可也榦投老來歸先
廬無可栖宿之地得法雲寺僧廬數間葺治居之今已
安如山矣蔬食飲水亦可以老更得如尊兄數人朝夕
往來則尤幸也一出良勞有司不明久矣豈特士子一

試而已哉

投老來歸百事非舊後生輩皆以為讀書者充塞時文之具矣必欲全不讀書專念一文一葉者為是彼亦豈欺我哉左右以年少便蒙不令讀書之號此可以觀人物矣勉之彼不足與較也榦無屋可以為羣雛之庇近得法雲寺居之僻寂正拙者所宜新正能下訪否

與成叔之

子元
蕭書

榦衰晚為貧冒昧不意邊事擾擾如此初至人面不相

識便有浮光之警幸即退衄此亦汲汲為自治計今城
壁已就人心已安可以無恐矣但年月已暮光陰無多
矣已作書懇諸公求歸不然則來春亦決意為歸計彼
勢誠弱人心勇銳亦頗勝丙寅丁卯間但諸賢處事皆
未見有足恃者中原分裂兵革方動未有息肩之日謀
國者但欲苟安未見其可也

丁丑冬在
舒州時書

榦以與當路諸賢議論不合不忍蠹民誤國力辭歷陽
安慶奏事之旨深入康山堅坐幾百日竟以此忤意平

日不相樂者從而擠之罷命之至而此身已歸至臨川
矣向使冒昧為修門之行為辱豈小哉自此遂得暫斷
四路頭溫故書以待盡然有一事欲與契兄議之若蚤
下訪幸甚北山倦翁不免一出因與之別想亦不免入
郤也生平故舊如賢者今幾人邪以是尤懸懸也

戊寅
罷辭

召命
來歸

餘諸况如常痰嗽不止亦不足為苦也禮書既畢日與
二三朋友考訂暇則相與番閱舊書亦足自適耳來教

縷縷以貧為苦此吾人所通患然平生亦只有此一字
可以上荅吾君與父師耳必欲求足則須是棄其所學
乃可是何異持千金之璧以易一瓦缶邪投老來歸頗
覺鄉俗大不如二十年前足下父子生平自負卓卓如
此苟未至飢餓不能出門戶亦不如且伸眉之為愈也
嘗見陳子昭勸賢者教兩令似習舉業賢者力折之此
卻是子昭美意亦是渠生平艱苦見得如此今說得太
高纔經挫折便就委靡卻不濟事也足下亦想未深知

某之事體只看後年正月下了致仕則夫妻父子必至
流離此亦已先安排下此一著對他不足畏也春初蚤
入城此間有安下處岳陽有一朋友在此真能任道者
恐其正月末即歸早來聽其議論甚可壯也

己卯

榦自夏間為氣疾所苦至今未脫體此病恐與之同死
生也更得兩三年在世間讀了所願讀之書則可以無
恨矣潮陽之命力以疾辭已再上矣以必得為期也貧
固可畏然亦留一個餓死做樣子亦不須人人安飽也

新春和暖亦能一出否

榦辭免之命再上竟未有處分中間都城大火又復無暇及此亦決不能復出便做掛冠主張遲速亦不必論也賢父子何日入城近覺向來朋友講論不親切後未有不束之高閣者近卻有一二人真可共學獨恨不得相與款語也

與鄭

失名

榦愚不肖過蒙眷予之厚自惟怠惰深懼無以副期待

之意尚蘄有以教之乃幸扁舟浮江訪長者於象山之
中以快平昔慕用之私不替寢食稍暇當求遂所願也

勉齋集卷九